

Puisi tanda simpati Malaysia

Perbezaan sempadan geografi tidak mematikan usaha bantu penduduk Gaza

Oleh Tuan Nur Suhaila
Raja Muhammad
bhsastera@nstp.com.my

KESUNGGUHAN membantu rakyat Palestin di Gaza yang ditimpa malang, direalisasikan pada Malam Amal Selamatkan Anak-anak Palestin oleh Dewan Bahasa dan Pustaka (DBP) dan hasilnya terkumpul RM105,696 bagi mengisi Tabung NSTP untuk Gaza.

Acara yang menggabungkan persembahan deklamasi, lagu puisi dan paparan multimedia, sedutan kezaliman rejim Yahudi di Israel serta jualan bazar bagi mengutip derma khusus sebagai tanda mengingati setiap nyawa yang terkorban, nyata berjaya mengundang derma daripada beberapa korporat prihatin.

Dawama Sdn Bhd menyumbang RM50,000, Lim Kokwing Universiti menaja nyanyian Datuk Siti Nurhaliza Taruddin (RM20,000), deklamasi puisi Prof Madya Dr Lim Swee Tin dan anaknya, Lim Feng Feng (McDonald's RM5,000), Sasterawan Negara (SN), Datuk (Dr) A Samad Said (Pengerusi Eksekutif Dawama Sdn Bhd, Mohamad Luqman CheHarun-RM2,000), penyumbang tak bernama RM4,000 dan hasil jualan gerai DBP RM24,696.

Acara pada malam 6 Februari lalu turut membuktikan kepada Duta Khas Palestin ke Malaysia, Abdulaziz Abughoush, betapa prihatinnya

rakyat Malaysia kepada rakan seagama mereka meskipun jauh terpisah oleh sempadan geografi, umat Islam tetap ber-satu.

Penyair yang juga Pensyarah Universiti Putra Malaysia (UPM), Shamsudin Othman, memecah kesunyian malam dengan kelantangan suara dan kudrat mudanya menerobos episod yang membawa kedudukan rakyat Palestin melalui puisinya, *Gaza: Malapetaka Apakah Ini?*

Sebuah duka; dengan bahasa apa lagi untuk aku bingkiskan setelah dua puluh dua hari berhujankan peluru, bom dan fosforus tanah suci menjadi taman pusara tanpa nisan kanak-kanak dan warga tua yang tidak mengerti makna kezaliman dan makna kekesalan.

Sedih apa lagi yang bisa aku maknakan setelah sepuluh hari gencatan senjata di meja damai air mata dan jerit derita masih kedengaran saat rindu mendamba kelahiran Salahuddin al-Ayubi juga doa kunjungan sekawan ababil....

Peserta Program Penulisan IOWA 2007, Malim Ghozali PK, dengan wajah selamba mengutuk kekejaman Zionis Yahudi Israel yang men-

dapat sokongan Amerika Syarikat dan Britain sehingga meletakkan mereka ke tahap haiwan lewat, *Di Gaza Telah Terluka Semuanya Sementara Anjing-Anjing Liar Itu Terus Menggila.*

Lapar dahaga dan kematian tak lagi hiraukan geritis selaksa peluru kereta kebal dan mesingan dan langit hitam diterangi cahaya letusan bom dan letusan peluru berpandu Zionis, lalu pahlawan-pahlawan Hamas pun tersenyum menanti panggilan syuhada.

Di Gaza anjing-anjing liar Zionis Yahudi baka kacukan Washington-London-Tel Aviv terus mengganas menggigit dan membunuh segala yang bernyawa....

Penerima Anugerah Penulisan Sea 2004, Dr Zurinah Hassan, memulakan puisinya dengan dodoian yang menggetarkan jiwa khalayak malam terbabit ketika beliau melapah nasib malang kanak-kanak Palestin, mangsa politik di Gaza sehingga mereka menjadi mangsa tanpa diminta melalui, *Anakku Yang Bernama Palestina.*

Anakku yang bernama Palestina Seperti anak-anak lain di dunia Dia manis dan mesra Seperti anak-anak lain di dunia Dia pun ke sekolah

Dan diajar menyanyikan lagu setia Kepada tanah air, agama dan bangsa.

Dan hari ini dia tidak mungkin memahami apa-apa Dia hanya menangis, meraung Menggelupur dengan tubuh melecur Terbujur di bawah rumah yang hancur....

Seorang lagi Pensyarah UPM, Prof Madya Dr Lim Swee Tin, menggegarkan pentas malam itu dengan cerita sejarah penderitaan Palestin lewat, *Api Zionis, berduet dengan anak perempuannya, Lim Feng Feng (Tuhan, Kepada-Mu Kami Memohon Perlindungan).*

Palestin, Palestin, Palestin Kami di sisimu izinkan meriba nestapa purba Ingin benar kami membalut semua luka sukma Api Zionis itu sambaranya sinis Cengkam bumi kalbu dan batinmu terhiris Palestin, Palestin, Palestin Teguhkan azam kentalmu, bentangkan juga sempadan terakhirmu Kutahu keimanan ketaqwaan tak pernah goyah tak akan ter-patah, dan, Palestin katakan: "Kan kupadamkan selahapnya api keangkuhanmu itu."

Bingkisan rasa (Dr) A Samad, menyelinap ke tangkai hati khalayak melalui *Sumpah El-Atatra* dengan pen-

ceritaan semangat juang anak El-Atatra dalam memartabatkan bangsa sejurus membina semangat juang melawan serangan Zionis Israel.

Anak-anak lahir di tengah khemah menyala tekun menafsir isi sejarah rahsia. Nyata kini titisan darah para pembela akan mengharumi kafilah di El-Atatra.


Tiada tangga jatuh dibiarkan di Gaza. Anak-anak El-Atatra cepat membinanya. Tidak akan ada terowong seharum ini di mana satu korban, dua bangkit lagi.

Hampir 1,000 khalayak yang membanjiri Balai Budaya Tun Syed Nasir malam itu turut disajikan dengan lagu *Damai Yang Hilang* oleh Kumpulan Nasyid Rayyan, di samping persembahan Siti Nurhaliza, Ras Adibah Radzi dan Aisyah serta Shazet & SRB.

Ketua Pengarah DBP, Datuk Termuzi Abd Aziz, yang hadir sama bagi menyerahkan cek RM105,969 kepada Editor *Sastera Berita Harian*, Salbiah Ani, turut berpeluang menyaksikan baca puisi Prof Datuk Mahmood Zuhdi, Saroja Theavy, Datuk Ahmad Said, Zaen Kasturi, Ahmad Shukri Abdullah, Datuk Dr Kamal Abdullah (Kemala), Puzi Hadi dan Ismail Dahaman.




Dr Zurinah Hassan



A Samad Said



Shamsudin Othman



Malim Ghozali PK